

Tuduhan lobi projek: Rafizi koreklah lagi, kata Zaid Ibrahim
Malaysian Insider
Feb 27, 2014
OLEH MOHD FARHAN DARWIS

Amalan mengemukakan surat sokongan adalah lumrah bagi orang politik yang menjadi amalan semua pemimpin parti sama ada daripada Pakatan Rakyat (PR) mahupun Barisan Nasional (BN), kata Datuk Zaid Ibrahim.

Zaid pada sidang media di kediamannya di Petaling Jaya hari ini berkata, dakwaan yang dilontarkan Pengarah Strategi PKR, Rafizi Ramli terhadapnya adalah "politik budak jahat."

"Jika saya memajukan dua emel kepada Rafizi, ia bukan bererti saya melobi.

"Ketika itu Rafizi hanya budak Anwar (Datuk Seri Anwar Ibrahim) yang tiada jawatan. Jika saya hendak melobi untuk kepentingan saya, saya boleh terus jumpa dengan menteri besar atau exco, bukan budak pejabat Anwar," katanya.

Sebagai orang politik Zaid berkata, meminta pertimbangan kerajaan bagi pihak orang ramai atau ahli perniagaan yang tidak dikenali, tidak menjejaskan integriti beliau.

"Saya hanya meminta pertimbangan, bukan memaksa kerajaan mengikut kehendak saya. Adakah itu pun Rafizi tidak tahu membezakannya?" soal Zaid.

Zaid turut menegaskan, dalam isu yang didedahkan Rafizi, beliau langsung tidak mempunyai sebarang kepentingan terhadap kedua-dua syarikat tersebut.

"Rafizi koreklah lagi sikit. Banyak sikit. Apa lagi projek saya lobi dengan kerajaan negeri," katanya.

Hakcipta © 2013 The Malaysian Insider

Source: <http://www.themalaysianinsider.com/bahasa/article/tuduhan-lobi-projek-rafizi-koreklah-lagi-kata-zaid-ibrahim>